



**KENYATAAN MEDIA  
BAHAGIAL HAL EHWAL UNDANG-UNDANG  
JABATAN PERDANA MENTERI**

---

**MADANI BEKERJA: MISI LAWATAN KERJA RASMI MENTERI DI  
JABATAN PERDANA MENTERI (UNDANG-UNDANG DAN  
REFORMASI INSTITUSI) KE REPUBLIK INDONESIA  
MEMPERKUKUH INTEGRASI UNDANG-UNDANG ASEAN DAN  
KERJASAMA DUA HALA MALAYSIA-INDONESIA**

**Jakarta, INDONESIA | 9 MEI 2025** – Komitmen berterusan Kerajaan MADANI untuk memperkukuh kerjasama serantau bersempena dengan Kepengerusian ASEAN 2025 diperkukuh melalui lawatan kerja rasmi Menteri di Jabatan Perdana Menteri (Undang-undang dan Reformasi Institusi), YB Dato' Sri Azalina Othman Said, ke Republik Indonesia bersama dengan delegasi Malaysia bermula 8 Mei 2025.

Semasa lawatan tersebut, YB Dato' Sri Azalina Othman Said telah mengadakan perbincangan yang sangat produktif dengan Tuan Yang Terutama Bapak Supratman Andi Agtas, Menteri Hukum Indonesia. Perbincangan tertumpu kepada pengukuhan kerjasama undang-undang dengan meneroka keutamaan bersama dalam perkara-perkara terkait dengan reformasi institusi dan undang-undang, selaras dengan tema ASEAN untuk 2025: Keterangkuman dan Kelestarian.

“Malaysia dan Indonesia berkongsi hubungan bersejarah yang akrab dan kukuh yang telah terjalin sekian lama. Pengukuhan kerjasama dalam bidang undang-undang dan keadilan antara kedua-dua negara akan mengeratkan lagi hubungan ini dan menyumbang secara bermakna kepada aspek keamanan, keselamatan dan kemakmuran di rantau ini,” kata YB Dato' Sri Azalina Othman Said.

Indonesia kini merupakan rakan dagangan kedua terbesar Malaysia di ASEAN dan keenam terbesar di dunia, dengan perdagangan dua hala meningkat kepada USD 25.5 bilion pada 2024. Kedua-dua kerajaan telah berjanji untuk mengeratkan hubungan ekonomi, dan pada Jun 2023 Malaysia dan Indonesia menandatangani enam instrumen dua hala yang meliputi kemudahan perdagangan dan pelaburan. Rangka kerja perundangan dan institusi sedemikian adalah penting untuk memastikan kepastian komersial dan meningkatkan keyakinan pelabur apabila perdagangan dan pelaburan terus berkembang di seluruh rantau ini.

Lawatan ini juga memberi peluang kepada YB Dato' Sri Azalina Othman Said untuk menyampaikan jemputan rasmi kepada TYT Menteri Supratman, Menteri Hukum Indonesia, ke Forum Undang-undang ASEAN 2025 (*ASEAN Law Forum 2025*). Ia dianjurkan oleh Malaysia dengan sokongan Sekretariat ASEAN, Negara Anggota ASEAN, dan Jepun. Forum ini merupakan platform dialog Pegawai Kanan Undang-undang ASEAN (ASLOM) yang akan mempromosikan Pertemuan Dialog Pegawai Kanan ASEAN (ASLOM) kepada keadilan, menyokong integrasi ekonomi serantau, dan memajukan perbincangan mengenai timbang tara, pengantaraan, keselamatan dalam talian, jenayah siber, insolvensi rentas sempadan, undang-undang komersial dan tadbir urus yang baik. Forum Undang-undang ASEAN 2025 akan menghasilkan deklarasi Kenyataan Bersama oleh Menteri-Menteri Undang-undang ASEAN bagi mengesahkan komitmen kolektif mereka untuk mengukuhkan timbang tara komersial antarabangsa dan pengantaraan di rantau ini.

Lawatan rasmi ke Indonesia ini merupakan sebahagian daripada siri misi diplomasi undang-undang ASEAN yang lebih luas yang dijalankan oleh Malaysia untuk mengukuhkan kerjasama dalam timbang tara dan pengantaraan komersial antarabangsa dan kerjasama undang-undang lain untuk memupuk landskap undang-undang serantau yang lebih bersepadu.

Malaysia kekal komited dalam misinya untuk membina ekosistem perundangan masa hadapan yang bukan sahaja memberi manfaat kepada ekonomi ASEAN, tetapi juga mencerminkan komitmen bersama rantau ini terhadap keadilan, tadbir urus yang baik dan pertumbuhan yang mampan.

YB Dato' Sri Azalina Othman juga turut menekankan kepentingan mempromosikan aspek pengantaraan dan timbang tara sebagai mekanisme yang praktikal, kos efektif dan cekap untuk penyelesaian pertikaian komersial. Mekanisme ini, kata beliau adalah penting dalam mewujudkan persekitaran undang-undang mesra perniagaan yang memanfaatkan perdagangan serantau, pelaburan dan kerjasama rentas sempadan.

Dalam mengesahkan dedikasi Malaysia terhadap penyelarasan undang-undang di seluruh ASEAN, YB Dato' Sri Azalina Othman menyatakan, "Masa depan rantau kita terletak pada kestabilan dan kepastian undang-undang yang berteraskan kepada ekosistem perundangan yang berdaya tahan yang boleh dipercayai pada setiap keadaan sama ada baik mahupun buruk. Melalui inisiatif reformasi undang-undang yang kolektif serta kerjasama yang erat, Malaysia terus komited untuk memperkukuh hubungan ASEAN yang lebih makmur."

Malaysia kekal utuh dalam misinya untuk membina ekosistem perundangan sedia masa hadapan yang bukan sahaja memberi manfaat kepada ekonomi ASEAN, tetapi juga mencerminkan komitmen bersama rantau ini terhadap keadilan, tadbir urus yang baik dan pertumbuhan yang mampan.

**BAHAGIAN HAL EHWAL UNDANG-UNDANG,  
JABATAN PERDANA MENTERI,  
9 MEI 2025**